

[Sápmi](#) 15.12.2016 klo 12:15

SámiSosterii evttohit badjelaš 730 000 euro ovddas doarjagiid RAO:s

**SámiSoster-searvi lea oažžumin boahhte jahkái eanet ruđa
iežas doaimmaid várás go goassige ovdal. Dán jahkái searvi lei
ožžon badjelaš 677 000 euro.**



Meahcceterapiija Goaikkanas-prošeakta ulbmilin lea veahkehit olbmuid, geain lea gárrenávnnasváttisvuodát. Govva: Vesa Toppari / Yle Sápmi

Ruhtaautomáhta ovttastus lea almmustahtán otne historjjás maŋimus doarjjaevttohusa juogus sosiála- ja dearvvasvuodasuorggi organisašuvnnaide. RAO juohká dál ruđa eanet go goassige ovdal, badjelaš 317 miljon euro.

RAO maŋimus doarjjaevttohus sirdasa dál sosiála- ja dearvvasvuodaministeriija giedahallamii. Ministeriija addá mearrádusa jagi 2017 doarjagiin oddajagi-guovvamánus 2017.

SámiSoster -searvvis stuorra proševttat jođus

SámiSoster-searváii lea RAO juolludan 731 185 e boahhte jagi doaimmaide. Searvvis leat jođus vihtta proševtta.

Golmma prošektii leat juolluduvvon stuorát ruhtasupmi. Ahkeolbmuid ja oapmahašdivššáriid doaimmaid várás lea Birgen Ruovttus -prošeakta, masa lea juolluduvvon 132 000 euro jahkái 2017.

Muittohallat-prošektii, mii doarju sápmelaš muiittohallan olbmuid, lea juolluduvvon 117 000 euro. Ja meahcceterapiija Goaikkanas-prošeakta, man ulbmilin lea veahkehit olbmuid, geain lea gárrenávnnasváttisvuodát, lea juolluduvvon 140 000 euro.

Badjeolbmuid buresbirgen -prošektii Buorre boahtteáigi lea juolluduvvon 70 000 euro. Ja SámiSoster odda prošektii, man ulbmilin lea čohkket nehttii sámegielat dearvvašvuoda materiálabáŋkku, lea juolluduvvon 64 185 euro.

Searvedoaimma várás SámiSosterii lea juolluduvvon 208 000 euro.

Searvvi doaimmat ja doarjagat leat viidon 16 jagis

SámiSoster rs lea jagis 1997 vuodđuduvvon riikkaviidosas sápmelaččaid sosiála- ja dearvvasvuodasuorggi searvi.

Jagis 2000 SámiSoster-searvi oaččui searvedoaimma várás 59 707 euro ja oktiibuot proševttaid ruhtadoarjagiin oaččui SámiSoster-searvi 92 503 euro jagis 2000.

RAO doaimma nohká, doarjagiid giedahallan sirdasa STEA:i

Ruhtaaautomáhta ovttastusa doarjjadoaimma sirdášuvvá sosiála- ja dearvvasvuodaministeriija oktavuhtii ásahuvvon Sosiála- ja dearvvasvuodaorganisašuvnnaid doarjjaguovddázii (STEA) boahhte jagi álggus, ja dalle maiddái RAO doaimma nohká ja ođđa Veikkaus Ot doaimma álgá.

Boahttevuodas sosiála- ja dearvvasvuodasuorggi organisašuvnnaht ohcet doarjagiid STEA:s, mii giedahallá doarjjaohcamušaid ja dahká jahkásaš doarjjaevttohusa sosiála- ja dearvvasvuodaministerijai. STEA maiddái gohcá ja árvoštallá doarjagiid geavaheami.



- Susanna Guttorm Yle